

Belum Tiba Masa Tubuh Jawatankuasa Khas Kabinet Kaji Semula Sejarah - Maglin mStar Online

November 03, 2011

Oleh SUSAN ALBERT KASSIM

KUALA LUMPUR: Timbalan Menteri Penerangan, Komunikasi dan Kebudayaan, Datuk Maglin Dennis D'Cruz menegaskan belum tiba masanya Jawatankuasa Khas Kabinet untuk mengkaji semula penulisan sejarah kemerdekaan negara ditubuhkan buat masa ini.

Sebaliknya beliau amat mengalu-alukan para sejarahwan untuk tampil menulis semula fakta-fakta yang tidak tepat bagi tujuan penambahbaikan.

Beliau berkata demikian bagi menjawab soalan Ahli Parlimen Kubang Kerian, Salahuddin Ayub yang ingin mengetahui sama ada kementerian itu bersedia membentuk sebuah jawatankuasa untuk mengkaji semula penulisan sejarah kemerdekaan negara.

Menurut Maglin, seandainya ditubuhkan jawatankuasa itu, maka pembangkang akan mengatakan bahawa sejarah dicampur-tangan oleh ahli politik.

"Oleh itu, lebih elok sekiranya kita biarkan para sejarahwan, penyelidik dan cendekiawan menubuhkan badan-badan tertentu sekiranya ada keperluan untuk menilai atau menulis semula sejarah," ujarnya.

Jelas beliau, sejak negara mencapai kemerdekaan, penulisan sejarah oleh golongan sejarahwan tempatan semakin berkonsepkan sudut pandangan Malaysia.

"Namun menyedari sejarah merupakan tulisan manusia yang harus diperbaiki, mana-mana fakta yang tidak tepat perlu ditambah-baik," katanya.

Sehubungan itu, Maglin berkata, kementeriannya menerusi Jabatan Arkib Negara bersedia memberikan kerjasama dalam menyalurkan maklumat yang ada dlm simpanan untuk dijadikan sebagai bahan rujukan dan bukti sahih dalam usaha menulis semula sejarah negara seandainya diperlukan.

"Selain daripada rekod rasmi, arkib juga ada menyimpan koleksi rakaman sejarah lisan yang dilaksanakan melalui sesi temu bual, dan wawancara dengan tokoh negara dari pelbagai bidang dan latar belakang," tambahnya.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/11/3/mstar_berita/20111103133021&sec=mstar_berita